

1 DZOHANE

NOHO DZAIRA PEPA BOSABOSA

Dzohane Dzebeteo qeeteta
Epeso Nagapa, Asia Gattiqa
Tii 71

Sinabidza Abi tupu Samane
Nagapa qesa
Asia Gattiqa ma Haba qesa

QARAQARA TATANGAHO NOO

1 ¹Dzoobe Maimane ma Abi Boseba ma Khameto:
Khoobanipamuta Ohongaho Too Noo qaata noi ttokata baami
noho pobike napa gama nookorai. Oonihe qesa ma nanai nese nanamema
noke moo pobiteqi botoma hesate qaata oi qaraqaraho noo khooba oioni.
²Qaraqaraho Khooba noi Ohonga Maiho torota qaaqi kebanoke nanaho
toro paana naatemi nanai noho mee moo nooka soubireqi noho isereke
nikeho torota mootomi nike pobi nookaqi oke tani totota.

³⁻⁴Oho nooke nana gama nikeho toro hiire paanaitemi oho quba nike
nanama gama ttaike Ohonga Mai ma khata noho Dzesu Kiristuho torota
oora ma qaara qidza saridzorai. Oonita oho nooke nana ttarita qeetemi
napaho qupa qidzanipamu naatorakoi, dzoobe!

OHONGAI ABIHO OORA MA QAARAKE BAIBURORAI

⁵Nookare, Ohongai dzadzaho khooba oonita noho neta qupi ma qanga
te ooraidzara. Noo oke nana noho toro nookaqi oke nike pobi hiire.
⁶Oonita napai oora ma qaaraho qupi kiringata ooqa too kakama hee, Eo
napai Ohongama isanate ooraiqa hiiqaquko, noo oi obera naatemi oora
ma qaara napahoi ikoikoho isaki naatakoi.

⁷Oonihe Ohongai dzadzaho khooba ooqi napaho oora ma qaara
baiburomi noho khata Dzesu Kiristuho dzuui napaho kahosake teete

soubiremi napai noho teteta tuumami oora ma qaara napahoi noma gama teena naatemi dzapanoma naatakoita mooro.

⁸Qate napahota teei kahosama ooqi sama nome ikobeteqa hee, Naho kahosa bamuiqi hiibaquko oi teeho quba bamuhe Ohongaho tete mee oi noho torota ooraama naatemi noi gimuttake eete oke hiibakoi. ⁹Oho quba napahota kahosa ooma oke napamae ao paanaitemi kahosa tesutesu Maikhatai pobipobi baura nomeke qaupuite kahosa oke teeteqa noi napake qanga minaraho neta qagaumakoi, uububuu!

¹⁰Oonita hiibi, kahosa napameke qahitotoqa hee, Baamuiqa hiibaquko napai Ohongake obera hiiremi noho oora ma qaara qidza oi ikanomake eete napahota meenoma naataqu, baamu.

KIRISTUI BASARAHO ISAKI ONI

2 ¹Khameto name, nike kahosa potti biire qaarare hiireqi ana noo eranomake qeete. Oonihe teei kahosata taataquko napahota gesina abi teei ao noho quba Ohonga Maiho toro noo hiibakoi, abi pobi oho dzapaio Dzesu Kiristu. ²Noi kahosa napahoho basara isaki oorai mi Ohongai ooma abi oke suraitemi noi qidzanatakoi.

Oonihe oi kahosa napaqaho keke bahe ttoka abi minaraho kahosaho basara (oho isakita beebeke oorai). ³Noi pai mootomi oke napa qusubaitoraiho isakita napai noke gesina naatoraita qupadzomare.

⁴⁻⁶Oonihe teei oho pai qusubaitaama naateqa sepeke hee, Oo ana Kiristu gesinaniqi hiibaquko noi obera abi, tete mee oke noi saridzaamake oorai. Oho quba teei noo oonomake hiibareiqa noi Kiristuho oora ma qaaraho isakita qaaqake oho totohotu hiiremi isanatakoi. Oi teei Kiristuho noo qusubaitorai, meenipamuke Ohongaho dzaodzaoi abi oho qupatu meupu oorai. Oonita napai noho dzaodzao eetoraiqako ao napai noho pobi naate ooraiqi qupadzomare.

KIRISTUI PAI MOOTOTAHO TETE

⁷Dzairamane, ana nikoho quba qeesubi oi pai usaqe bahe agobake nikoho toro mootomi nookorai teena. ⁸Oonihe dzadza meeoi ao togoihimi napata qupi bamu naasubihe Kiristui pai oke napata meenomaitemi oi poiqa paha usaqe naatoraridzoni. ⁹Oi teeho bahe teei dzaira nomeke ibo eseuqi khooba qanga nomeke ota paanaitoraita mooro.

¹⁰Oi teei dzaira nomeho quba dzasa eete hoobirorai meeke noi dzadzaho pobi, oonita apei nohoke nookami qanganataqu? Baamu. ¹¹Qate teei dzaira nomeke ibo eetorai oi teeho bahe qupi oi noho nese sirihami noi tete qiri eete basa qooto tuumorai oonita abi oi qupiho pobi keke.

¹²⁻¹⁴Oonita sinabidzaho maimane, nike bosata Kiristu gesina naate abike dzoomaqi baaqorai oke ana nike qupanomaiteqi qeete.

Qate qesai dzobadzoba nikemeta ooraimi Ohongaho noo nike tuuhoromi nike oho bedzaeta Iibadzake suqobirorami ana oho hasa hiireqi qeete, dzoobe.

Ma qeseba khameto name, Kiristui nikeho baura eeteqi kahosa nikelohoke teetemi, dzoobe abiniqake nike Ohonga Mai gesina naatemi ana oho qaki naate qeete. Oonita erai maimane ma abi boseba ma paha khametoho noo oke ana gama qeesubi, dzoobe!

TTOKAHO POMAKE KUIBIDZARE

¹⁵Oonihe teei ttokaho teteoh dzaodzao eeteqi bamu Ohonga Maiho dzaodzao eetaqu. Oho quba ttokaho iiha ma dzoobidza ma oho pobi oke gama goottae eete qaatare. ¹⁶Ttokaho tete samane, oi pasenani mae peetta ma qeraqerani mae sama qusuba baura oi gama Ohonga Maiho nena bahe ttokaho keke.

¹⁷Oonita ttokaho tete ma oho rumuba samane oi gama bamu naatakoi. Oonihe teei Ohonga qusubaite tuumorai noi agoba qaraqara qaarakoi, oi dzapanomani.

KIRISTUHO IBO BIRANATORAI

¹⁸Khameto nookare. Nike nookami Kiristuho iboi biranatakoiqi hiirorai. Oonihe oho bodza ao dzamoqa naatemi aoke Kiristuke ibo eetaquho isaki samane biranatoraita qupadzomare. ¹⁹Ao bodza eetenita abi qesa bosata napaho bisata qaata nokoi napaho nenanidzara. Napaho nenanipamu oorapuko nokoi napama gama ipibidzorotahe, noko napa qaate tuumami napai moomi nokoho khooba maina.

²⁰Oonihe Kiristui nike Qaheuba Sumasama sooromi ao nikemae khooba qesaquesa gesina naatorai. ²¹Oonita ana te hee, Nike tete mee ruume naatoraiqi hiire qeetaranihe qoqotoke nike tete gesina naasubiqi hiire qeete. Oi quba obera minarai quba meeho isaki oonidzara oke nike qupanomaiteqi qeete.

²²Oonita apei obera abi bahe, teei hee, Dzesu Kiristui te dzakapanoma oonidzaraniqi hiibaqu noio obera abi. ²³Noi Ohonga Mai ma Khata bai hiireqi Kiristuho ibo naatorai. Oi apei Khatake bai hiibaqu, Ohonga Mai te noho toro ooraidzara. Qate teei Khatake raraku biidzaqu, Mai ma Khata esese noho torota oorai.

²⁴⁻²⁵Oi nike bosata sinabidza nookatanita oho isakita nike qaaraquko meenipamuke Ohonga Mai ma Khataho pobita qaarakoi. Oho quba nikeli bosata nookata sinabidza ota ipibireqa Ohonga qaraqara tatangaho naru napake pobi hiiremi oorai oke nike qupadzomaqa battigara naatare.

TTOKAHO IKOIKO OKE POTI BIIDARE

²⁶⁻²⁷Oonita qesai nike ikobetoraihoke ana qeete. Oonihe Kiristui nike ao Sumasama sooromi noi nike tuuhoroqi quba samane banaitorai oi

haba bahe meenipamu. Oonita naane quba ttokaho teei nike qoqopa eetoraqu? Baamuhe, Sumasa noomae nike kuni ma ttani biiremi nike noho pesuta qaaqa mee saridzakoi.

²⁸Khameto name nookare. Nike Ohongaho pesuta qaarare. Qaami noi paana naatemake napai midzaamake konekonema noho dzagata biranatakoi. ²⁹Ohongai rike ma pobi oke nike gesina. Oonita qesai rike ma pobi oorai nokoi Ohongaho khametoniqi qupadzomare.

OHONGAHO KHAMETONIPAMU

3 ¹Moorare. Ohonga Mai napaho quba dzasa mina eete dzapami napa ao nomaevo khameto naate oorai. Oonita ttokaho abi napake khoukhau oi teeho quba bahe nokoi oho qesa Ohongake khoukhau oni.

²Dzairamane, meenipamu napai ao Ohongaho khameto naate oorai onihe napaho birabira ikanoma naataqu oi paana naataamake oorai. Oonihe oi paana naatemake Kiristu ooraiho isaki napa oorakoi oke napa qupadzomare. ³Oore, ape ma apei ao noho neseta oho kiito biirorai, Kiristu sesesei ooraiho isakita nokoi oora ma qaara nokome pobiteqi sesesei ooraita qupadzomare.

⁴Oi abi teei kahosa teeke sarihiqako ao hu noo riitakoi, oi teeho bahe kahosa minarai gama hu noo dzongobetaquho isaki keke. ⁵Oonihe Kiristui kahosaamanipamu ma noi abiho kahosa minarake aimbamuitareiqi baata. ⁶Oonita apenei Kiristuhu torota atimorai nokoi kahosaama naatorai. Qate kahosa qaupuqaupu abi nokoi Ohongaho akoako mooraama naateqi noke gesina naataamake oorai.

⁷Khameto name, oho quba teei noke ikobetaino. Kiristu rike ma pobi, oonita apenei noho teteke iihaqi quba qidza eetorai nokoi noho rike ma pobi saridze ooraiqi oke eetorai.

⁸Qate Iibadzai khoobaqata sohoro kahosa eete baaqoraiho quba moomi apenei kahosa eetorai nokoio noho asita oorai. ⁹Oonihe Ohongaho Khatai Saataho baurake rubengaitareiqi biranateqi abiho habara naate baateta. Oonomake eesuqi Ohongai khameto nome dzoomami noho biidza nokoho qupatu oomi nokoi kahosa quba isanataama naate oke eetaama, oi nokoi ao Ohongaho asita biranate oorai, dzoobe.

¹⁰Oonita Ohongaho khameto ma Iibadzaho khameto oho koridza ooqata paana naatorai. Oi teei baura qidza eetaama naatorai mae dzaira nomeho quba dzasa eetaama naatorai abi oonomai teqaha Iibadzaho asi qaate Ohongaho asita biranate ooraidzara.

DZASAHO TETE

¹¹Oi agobanipamu napa Kiristuhu noo nookami hee, Nike qesaho quba dzasa eete qaarareiqi hhireta. ¹²⁻¹³Qate Kai noi Saataho nena ooqi noma nomeke teeteta oi quba apeho quba bahe noma nohoho baura

qidzanihe, nomaeħoi qanganita ttoka abi nokoi oonomake eeteqi nike ibo eete teetaquko eetoqa roqobetainohe nike oho teteke suimaino.

¹⁴ Ohongaho oko ma boto tupuho dza minake eetorai napai oke hee, Dzoobe, napai baata neta qaatahe ao qaraqaraho neta biranate ooraiqa hiibaridzo. Oonihe teei abiho dzasa eetaama noi baataho qausuta oorai.

¹⁵ Ma apei dzaira nomeke ibo eetorai noi taanga abi oonita qaraqara tatanga noho toro ooraidzara oke nike bageke eete qupadzomare.

¹⁶ Oi Kiristui napaho quba dzasa eeteqi te qaraqara nome qaanataranita napa dzasaho tete oke gesina naate qidzoke qaraqara napame quesamane napameke qaanataqu. ¹⁷ Oi teei ttokaho meuputa ooqi moomi noho qesai qangahasita oomi noi qoredza eete noke ota hoobidzaama naataqu oi teeho bahe noi qurita ooqi Ohongai dzasa eetoraiho teteke noi ruumenita qupadzomare.

¹⁸ Khameto name, eto napai too kakama dzasa eetainohe meenipamuке dzasa quba hobihobi baura samaneke eete qaarare. ¹⁹ Oke eeteqa napai Kiristuhu pengata qupa napame too teeteqa hee, Oo napai meeqaho isaki ooniqi qupadzomakoi. ²⁰ Oonihe qupa khatai napake qomaqoma hiibaquko erake qupadzomare, Oo Napaho qupai ao napake qomaqoma hiireqi Ohongaho qaamodzamodza eetoraita Ohonga noomae napake qomaqoma hiibaquko bamenomanipamu naatakoiqi hiibaridzoni. Oho quba eto ikobetaino.

²¹ Oonita dzairamane name, qupai napake qomaqoma hiibaama naatemi napai isanate attiamake Ohongaho toro biranatakoi. ²² Oi noi pai mootomi napa oke qusubaiteqi noho dzake qusubaite qaaqa, noho toro quba teeho quba pupu hiiremi moitakoi.

²³ Oonihe pai oi teeho bahe, Napa Kiristuhu dzapata atimaqa quesaho dzasa eete qaarareiqi hiireqi pai oke mootota. ²⁴ Oho quba teei pai ooqake qusubaite qaaqa isanate Ohongama qesa dzaira eetorakoi. Oi Ohongai ao Sumasa nome napake moitemi hobihobi bagenoma naatorai oke napai mooqa hee, Meenipamu noi napake dzaira eetoraiqi hiibaridzoni.

OHONGAHO SUMASA MA TTOKAHO QAHURA

4 ¹Dzairamane nookare. Too abi oberaobera samanei haba gegebetorai. Oho quba qaru baaorai eto nokoho tete pureke qaupuitainohe nokoke toronaite moomi apenei Ohongaho nena, nokoqaho noo qusubaitare. ²Oonihe tete apeta Ohongaho nenake gesina naataqu oi era. Qesai hee, Oore Dzesu Kiristui meenipamu abiho sama eeteqi baataiqa hiibaqu nokoio Ohongaho nena.

³Qate quesai oho bai hiibaqu nokoio Ohongaho nenanidzara. Ohongaho ibo biranatakoiqi hiirorai oi ao ttokata ooraita oho isaki oioni. ⁴Oi Saatai ttokata nokoho torota baura eetemi noko oho totohota hiirorai. Oonihe,

khameto name, Kiristu beedzaeho maikhatai nikeloh toro baura eetemi nikeloh isakita too abi oberaoberake suunaite soubidzaridzoni. ⁵Nokoi ttokaho nena ooqi ttokaho sinasina hiiremi ttoka abi nookorai.

⁶Qate napai Ohongaho nena oomi paha apenei Ohongaho nena orai nokoi napaho noo nookoraihe, mainaho nena nokoi napaho noo nookaamanipamu. Ooqata tete mee ma tete obera paana naatemi napa ao batabidzaridzoni.

OHONGAI DZASAHO MAIKHATA

⁷Dzairamane, Ohongai dzasaho tete biraitemi napamae qesaho dzasa eete nokoke hoobire qaarare. Oi apenei dzasa quba eetorai nokoi Ohongaho biidzanita noke gesinani. ⁸Ohongai dzasaho maikhata oonita teei abih dzasa eetaama naataqu noi Ohonga ruumeni.

⁹Nooka, Kiristui napake eehahaita quba Ohongai Khata teena nome dzoobiremi ttokata biranatem i Ohonga dzasa eetoraiho khooba ota paana naatorai. ¹⁰Napai te Ohongaho dzasa eetaranihe noomae napaho dzasa eete Khata nome dzoobiremi noi kahosa napahoho quba napake basara eetemi orai oio dzasaho khoobani.

¹¹Oonita dzairamane, Ohongai napaho dzasa oonomake eetemi napai ikanomake eete qesaho dzasa eetaama naataqu? Baamu. ¹²Ohongake abi moo pobitaamanihe, Ohongai dzasa eeteqi napake tuuhoro qaami napai qesaho quba dzasa eete qaama dzasa oi napata meenoma naatakoi.

¹³Noi Sumasa nome napake moitemi napai Kiristuho toro atimami noi oho qesa napaho toro atimami napai ota noke gesina naatare. ¹⁴Oi Ohongai Khata nomeke dzoobiremi noi abi minaraho ingona naatetake nanai moo pobiteqi oho isere moosobita nookare.

¹⁵Oonita teei Ohongaho khata Dzesuke raraku biiremi Ohonga noho toro atimami noi oho qesa Ohongaho torota atimaridzoni. ¹⁶Ohongaio dzasaho khooba oonita teei noho teteta atimami Ohongai oho qesa noho torota atimakoi. Oho quba Ohonga napaho dzake eetoraike napa gama nooka tani naataridzoni.

¹⁷Ohongai dzasaho khooba oomi dzasa oi napahota meenomanipamu naatemi napai noma gama ne teenanita noi ipita abike maripa eetaqua napai naane attike eetaqu? Baamu. ¹⁸Atti ma dzasa oi te qesa dzaira eetoraidzara. Oi Ohongai abih dzasa eetemi dzasa oi abi oho toro meenoma naataamake oomi attih isaki naatakoi. Oi teei kahosaho ipike saridzakoihi hiireqi atti eetaridzo. Oonihe, Ohongai teeho dzasa eetemi dzasa oi nota meenoma naateqa attike qirutomakoita tete mooro.

¹⁹Qate napai dzasa eetorai oi teeho quba bahe, ²⁰⁻²¹Ohongai bosata napaho quba dzasa eetemi suimorai. Oonita teei Ohonga dzaira eetaqu noi paha abi dzaira eetakoi. Oho nooke napa Ohongaho toota nookami husi ma pai oioni. Oho qubake teei temu nomeke ibo eeteqi oho heeta

abike ikobeteqa hee, Oo anai Ohonga dzaira eetoraiqa hiibaqu noi obera abi. Oi noi temu nome moo pobitoraihe noke ibo eetorai. Oonita Ohongake noi moo pobitaamake ikabeteqi noke dzaira eetaqu? Bamu.

AI TATAUMANOMAI TTOKAHO TETE SUQOBIRORAI

5 ¹Ohongai khameto napake dzoomami napai gama hee, Dzesu noi Kiristu abi dzakapanomaniqi hiireqi dzomadzoma Mai ma khameto gama iso keke quesaho dzake eetorai. ²Oi napai Ohongaho dza eete noho noo qusubaiteqa paha khameto nohoho dza eetakoi, oke napa qupadzomare.

³Napai Ohongaho dzake eete noho noo isanate qusubaitaridzoni. Oi noho noo qusubaitequ oi bamenoma oorarorihe, ⁴Ohongai khameto napake dzoomami napai ai tataumaho dzubinanipamu naate ttokaho iiha ma dzoobidza samane suqobirorai. ⁵Oonihe teei bamu sepeke ttokaho iiha ma dzoobidza suqobidzaquhe, noi Ohongaho khata Dzesu noqaho neta soomaqi ttoka suqobidzakoi.

OHONGAI KHATAHO ISERE QIDZA MOOTOMI OORAI

⁶Oi Dzesu Kiristui abihi isakita ttokata baata oi mee. Noi mumure eserima baata, oi oba ma dzuuma noi baata. Oba sobasoba keke bahe dzuu, oi baataho sobasoba. Oonita Sumasai oke mee hiireqi noomae khameto napake beedzaenomaitorai. ⁷⁻⁸Oi Sumasa ma oba ma dzuu, quba tapari nokoi gama teenaiteqi noho baura mee hivorai.

⁹Qate abihi isereke napai nookoraita Ohonga noomae isere meenipamu mootoqi hee, Kiristui nahoh khataniqi hiiremi oho isereke napa qidzoke nookaama naataqu. ¹⁰Oi Ohongai khata nomeho isere mootomi teei oke nookaama naateqa Ohongake oberaniqi hiibakoi. Qate teei Ohongaho Khata noho neta soomami noomae hota ao meenoma naataridzoni.

¹¹Oonita Ohongai isere mootoqi hee, Qaraqara oi Kiristuhu botota oraita qaraqara oke ana nike qonotomi ooraiqi hivorai. ¹²Oho quba teei Ohongaho khata raraku biireqa qaraqara ao mai eetakoi. Qate teei Khatake bai hiireqa qaraqaraho dzore naate qaarakoita qupadzomare.

QARAQARA TATANGA AO AIMA OORAI

¹³Khameto nike Ohongaho khata noho neta tirere eetoraiho isakita ao qaraqara mai eetorai oke ana nikeho quba qeeteta qupadzomare.

¹⁴Oonita Ohongai quba mee hiibaridzoho isakita napai attiamake noke quba teeho quba pupu hiiremi bamu bai hiibaqu. ¹⁵Ma noi napaho pupu mee hiibakoiqi qupadzomaquko oho meeke napa isanate saridzakoita nookare.

¹⁶Qateqa, teei kahosa bamenoma aimami baataquho isaki naataqu noo oke bamu erata hesataquhe nikemaehota teei harateteqa kahosa

teeke saridzemi baataquho isakiama naataquko nike noho quba pupu
hiiremi Ohonga noke eehahaitakoi. Qate teei kahosa bamenomanipamu
saridzemi baataquho isaki naatemi nike ikaqi noho quba tete qiri eetaqu?
Noi ao baataho pobi oonita nookare.¹⁷Quba qanga minarai kahosa
kekenihe teei kahosa saridzeqa oho quba baataama oho isaki oorai, ma
teei kahosa saridzeqa baataridzoho isaki paha ooraita nookare!

¹⁸Oonihe napa moomi ape ma apeke Ohonga dzoomorai nokoi te
(saninoke) kahosaho teteta tuumoraidzara. Oi Ohongai khata teeke
dzoohiqa noke bakena geema qaama kahosaho maikhatai noke mai
eetaquho tete bamu.¹⁹Napai moomi Saatai ttokaho tete ma oho abi gama
susupu asi nometa baubotomi ooraihe napai keke Ohongaho dzagata
oorai.²⁰Oi napai moomi Ohongaho Khatai baaqi napake nokanoka
moitemi oho quba Khata meenoma noke napai gesina naateqi Ohongaho
khata Dzesu Kiristuho dzagaqata oorai. Nookare. Ohonga meenoma ma
qaraqara tatanga noo oioni.

²¹Oonita qeseba khameto name, etoqa Ohonga oberaobera tee ma
teeke upubidzainohe korabete qupa nikeme pobite qaarare.

Dzoobe, noo oioni

Anai Dzohane